



Broj: 03/1-50-14-7-27-4/16

Sarajevo, 28.7.2016.

PREDMET: Informacija o obavljenoj radnoj posjeti Komandi 4. pješadijske brigade OS BiH, Čapljina, 12. i 13.7.2016.

Sifet Podžić, predsjedavajući, i Šemsudin Mehmedović, član Zajedničke komisije za odbranu i sigurnost BiH, Boško Šiljegović, parlamentarni vojni povjerenik BiH, Ljiljana Milićević, sekretarka, Željko Grubešić, stručni savjetnik i Sanja Ćatibović -Ured za sigurnosnu saradnju Misije OSCE u BiH 12. i 13.7.2016. bili su u radnoj posjeti Komandi 4. pješadijske brigade Oružanih snaga BiH (4.pbr.).

Članovi Zajedničke komisije realizirali su ovu posjetu u skladu s Godišnjim planom rada za 2016. i s ciljem upoznavanja sa stepenom realiziranja zaključaka sa svoje 21. sjednice koji se odnose na proces javnih nabavki u sektoru odbrane. Na 21. sjednici Zajedničke komisije je, između ostalog, zaključeno da će Zajednička komisija nastaviti s posjetama jedinicama i komandama, te će zakazati tematsku sjednicu na kojoj će ponovo, s menadžmentom Ministarstva odbrane BiH i Zajedničkim štabom OSBiH, sagledati provođenje Opreativnog plana za prevazolaženja problema u javnim nabavkama u Ministarstvu odbrane i OSBiH, i u skladu sa svojim nadležnostima, dati ocjenu stanja u Oružanim snagama BiH, te tako nastaviti realiziranje planskih aktivnosti Zajedničke komisije u sektoru odbrane.

Brigadni generali Tomo Kolenda, komandant 4.pbr., i Mirsad Ahmić, zamjenik komandanta Operativne komande OSBiH sa saradnicima, bili su domaćini ove posjete koja je imala za cilj upoznavanje s trenutnim stanjem i aktivnostima ove brigade.

Generali Kolenda i Ahmić upoznali su predstavnike PSBiH sa strukturom, stanjem popunjenosti personala, tokom izvođenja operacija i obuke, civilno-vojnomo saradnjom, logističkim osiguranjem brigade te nizom pitanja koje daju sliku o stanju u ovoj brigadi (u Prilogu: Informativni brifing 4. pbr.).

Evidentni su veliki napori koje čini general Kolenda i Komanda 4.pbr. OSBiH u izvršavanju postavljenih zadataka i obaveza te se prepoznaje odlučnost, profesionalnost i opredijeljenost da se izvršava misija koju ima 4.pbr. Imponira odlučnost komandnog kadra da nastave ispunjavanje brojnih obaveza koje su pred njima, te je za svaku pohvalu činjenica da nema vanrednih događaja koji ugrožavaju stanje borbene gotovosti 4.pbr.

Međutim, konstatirani su i problemi s kojima se suočava ova jedinica, a ogledaju se u:

- **sve izraženijem problemu personalne popunjenosti koji je usložen povećanim trendom napuštanja OSBiH**, posebno u kategoriji vojnika, što ilustrira podatak da je u periodu januar-juni 2016. godine jedinice iz sastava Operativne komande OSBiH napustilo više od 150 PVL. Posebno je evidentan odliv PVL hrvatske nacionalnosti iz sastava 4.pbr. OSBiH. Vojnici, koji napuštaju OSBiH, nezadovoljni su, pored ostalog, visinom plaća i naknada te su u proteklim godinama neprekidno insistirali na tome da se promijene pravilnici kojima se regulira ova oblast. Tu i dalje nema adekvatne reakcije nadležnih iz MOBiH.
- **neredovnom i nedovoljnom logističkom osiguranju u kontinuitetu**. Nedostaju prehrambeni artikli (brašno, mlijeko i mliječni proizvodi, svježe voće i povrće, začini i drugo-tzv. klasa I). Jednolična je ishrana čime se direktno krši Pravilnik o ishrani, a nagomilane su količine i zalihe konzervi različitog sastava kojima već prolazi rok upotrebe te su jedinice primorane da ih vraćaju u logističke baze. Od nabavljenih 308 tona konzervi za potrebe OSBiH, već je evidentno da se izvjesna količina mora otpisati ili donirati zbog isteka roka upotrebe. Prva isporuka svježeg povrća u jedinicama očekuje se u periodu septembar-oktobar 2016. godine.
Iako se kvartalno trebaju sve klase namirnica u skladu s potrebama i planiranim budžetskim sredstvima, izostaje realizacija i to svakodnevno i dodatno uslošnjava stanje u jedinicama OSBiH.
- **zastarjelosti opreme koju koriste pripadnici ove brigade**. Motorna vozila, koja su u upotrebi, stara su u prosjeku preko 27 godina i preko 60% ih nije operativno. Nedostaju potrebni rezervni dijelovi, alati i pribor. Logorska oprema, koja je na korištenju u brigadi, stara je i sve više neupotrebljiva. Nedostaje motorno ulje za motorna vozila što dodatno ugrožava ionako nizak stepen njihove operativnosti. Nedostaju stručne osobe za redovno održavanje naoružanja i vojne opreme, birotehničkih, elektronskih sredstava kao i opreme specijalne namjene. Upitna je rentabilnost popravke za veliki broj materijalno-tehničkih sredstava kod vanjskih servisera koja su na upotrebi u 4.pbr.
- **izraženom kontinuiranom problemu u snabdijevanja intendantskom opremom**, a posebno je kritično stanje s radnim uniformama kojih više nema u zalihama.
- **nedostatku energenata** jer i pred narednu grijnu sezonu nisu ugovorene adekvatne isporuke te se postavlja pitanje zaštite ljudskih prava pripadnika Oružanih snaga BiH koji već niz godina imaju probleme s grijanjem prostorija u kojim žive i rade. Jedinice, koje se prevoze s ciljem stražarskog obezbjeđenja objekata, prevoze se vozilima koja su prilično lošem stanju i to je problem koji zabrinjava Komandu 4.pbr. OSBiH, jer se radi o životima pripadnika OSBiH.
- **dotrajalosti protupožarne opreme**, izuzev PP aparata koji su nedavno servisirani, te se postavlja pitanje nabavke brentača, specijalnih vozila i zaštitne opreme za gašenje požara.
- **obezbjeđenju neperspektivnih lokacija**, a logistička podrška ne prati realizaciju godišnjeg plana obuke i godišnjeg plana rada. Sve izraženije je nezadovoljstvo

pripadnika OSBiH uslovima života i novčanim naknadama za vrijeme boravka na terenu.

Posebno brine činjenica da Sektor za logistiku i snabdijevanje Ministarstva odbrane BiH ne ugovara na vrijeme isporuke energenata pred predstojeću zimu kao i rezervnih dijelova za vozila što direktno umanjuje operativne mogućnosti ove jedinice.

Članovi Zajedničke komisije su 13. 7. 2016. nenajavljeno posjetili i skladište za smještaj i sortiranje municije „Gabela“ u Čapljini. Posjeta je obavljena s namjerom da se sagleda stanje i stepen otklanjanja nedostataka koje je evidentirao Boško Šiljegović, parlamentarni vojni povjerenik BiH, tokom posjete 19. i 20. 4.2016.

Stariji vodnik Pero Markić –zamjenik komandanta lokacije s kolegama iz smjene, koja je angažirana na ovoj lokaciji, upoznao je članove Zajedničke komisije i parlamentarnog vojnog povjerenika s trenutnim aktivnostima, kao i s procesom otklanjanja uočenih nedostataka.

Konstatirano je sljedeće:

- I dalje nedostaju polimetri za mjerenje temperature i vlažnosti zraka u skladištima na ovoj lokaciji.
- Dio opreme za protupožarnu zaštitu je servisiran, ali i dalje je prisutan problem crijeva za hidrantsku mrežu koja su lošeg kvaliteta.
- I dalje se očekuje rekonstrukcija krovova u skladištima koja prokišnjavaju.
- Nabavljena je dovoljna količina paleta i lastre koji služe za dislociranje MiMES-a,
- Djelimično su nabavljena sredstva za higijenu te vojnici na lokaciji cijene da je tu stanje nešto bolje,
- Intendantska oprema koju koriste vojnici je i dalje u lošem stanju i dotrajala je. To se, prije svega, odnosi na uniforme i čizme koje koriste vojnici,
- Ishrana je i dalje neadekvatna. Jednolična je i nekvalitetna. Ne nabavlja se mlijeko i vojnicima se dostavljaju konzerve koje ne mogu zamijeniti ishranu koja je predviđena Pravilnikom o ishrani.
- Nedovoljan je broj profesionalnih lica za obezbjeđenje lokacije.

Iako je lokacija na kojoj je smješteno skladište „Gabela“ jedna od perspektivnih lokacija Oružanih snaga BiH, profesionalna vojna lica koja rade na ovoj lokaciji suočena su i dalje s nizom teškoća koja su sistemski loša.

Imponira profesionalnost, odgovornost i savjesnost profesionalnih vojnih lica koja rade na ovoj lokaciji.

Potrebna je pravovremena i brza reakcija na otklanjanju uočene slabosti, koje je konstatirao parlamentarni vojni povjerenik 19. i 20. 4. 2016. kao i članovi Zajedničke komisije tokom ove posjete (13.7.2016.).

Očito je da izostaje pravovremena i efikasna aktivnost nadležnih jedinica i komandi kao i menadžmeta MOBiH u otklanjanju uočenih slabosti i popravljanju sadašnjeg stanja.

Zaključak:

1. Radne posjete jedinicama i komandama Oružanih snaga BiH su neophodne i predstavljaju nezamjenjiv način u upoznavanju s pravim stanjem i funkcioniranjem sektora odbrane u cjelini.
2. Evidentirani problemi se ponavljaju već dugi niz godina i nije uočljiv nikakav pomak u njihovom rješavanju a odnose se, prije svega, na logističko obezbjeđenje i snabdijevanje Oružanih snaga BiH.
3. I dalje se koristi oprema koja je stara i kojoj ističu rokovi upotrebe, a što je posebno evidentno kod motornih vozila, logorske opreme i sredstava koja su potrebna za adekvatnu operativnost Oružanih snaga BiH u cjelini.
4. Nedostatak prehrambenih artikala, pogonskog goriva, uniformi i intendantske opreme posebno je zabrinjavajući i postavlja se pitanje do kada će nadležni u Ministarstvu odbrane BiH ravnodušno gledati na ovaj problem.
5. Uprkos svemu što je konstatirano i problemima koji su iz dana u dan sve izraženiji, s obzirom na neefikasno i neadekvatno logističko obezbjeđenje i snabdijevanje od strane Ministarstva odbrane BiH, Oružane snage BiH imaju vrhunske profesionalce i vrlo odgovorne vojnike, komandire i komandante kojima treba osigurati uslove da se bave misijom koja im je dodijeljena.

PREDSJEDAVAJUĆI KOMISIJE
Sifet Podžić

Prilog:

- Informativni brifing 4.pbr. OSBiH od 12.7.2016.

Dostavljeno:

- naslovu
- a/a